

**UDRUŽENJE PORODICA I
PRIJATELJA NESTALIH
OSOBA „SUZA“**

**PROGRAM RADA I FINANSIJSKI PLAN UDRUŽENJA
PORODICA I PRIJATELJA NESTALIH OSOBA “SUZA” ZA 2012. GODINU**

**Obrađivač:
Predsjednica Maida Ćurevac**

Sarajevo, maja 2012. godine

SADRŽAJ

I UVOD.....	3.
II PROGRAM RADA UDRUŽENJA “SUZA” ZA 2012.GODINU.....	5.
1. PROGRAMSKE AKTIVNOSTI NA OPREMANJU UDRUŽENJA “SUZA”	5.
1.1. Nabavka osnovnih sredstava i potrošnog materijala.....	5.
1.2. Rad na iznalaženju poslovnog prostora.....	5.
1.3. Definisane baze podataka.....	5.
2. AKTIVNOSTI NA DONOŠENJU REGULATIVE.....	5.
3. PROGRAMSKE AKTIVNOSTI NA TRAŽENJU NESTALIH.....	6.
3.1. Obilježavanje masovnih i pojedinačnih grobnica na području općine Rogatica i obraćanje Institutu za nestale BiH.....	6.
3.2. Obraćanje Međunarodnoj komisiji za nestale ICMP.....	7.
3.3. Obraćanje Federalnom zavodu za statistiku.....	7.
3.4. Obraćanje općini Rogatica za pomoć u pronalaženju nestalih.....	7.
3.5. Obraćanje porodicama stradalih i svim građanima Rogatice radi prikupljanja podataka.....	7.
4. PROGRAMSKE AKTIVNOSTI NA SPISKOVIMA ŽRTAVA.....	8.
5. SARADNJA SA VLADINIM I NEVLADINIM ORGANIMA, ORGANIZACIJAMA I UDRUŽENJIMA.....	9.
6. SARADNJA SA SRDSTVIMA INFORMISANJA.....	9.
III FINANSIJSKI PLAN UDRUŽENJA “SUZA”za 2012. GODINU.....	10.

UVOD

Zbog iskazanog nezadovoljstva porodica nestalih osoba dinamikom i rezultatima rada Instituta za nestale osobe, te pravdanje takvih rezultata nedostatkom pouzdanih informacija o lokalitetima masovnih i pojedinačnih grobnica, članovi porodica i prijatelji nestalih osoba u periodu 1992-1995 odlučili su da održe i održali su 25.10. 2011.godine sastanak sa početkom u 17,15 sati u ulici Fetaha Bećirbegovića broj 31. Sarajevo, na temu utvrđivanja strategije rada na ubrzanju pronalaska nestalih osoba na prostoru Rogatice.

Sastanku su prisustvovala 32 osobe.

Nakon iscrpne diskusije jednoglasno je donešen Zaključak da se formira Inicijativni odbor , koji će u roku od 20 dana zakazati Osnivačku skupštinu za formiranje Udruženja za ubrzanje traženja nestalih, pripremiti Statut, program rada, odluke o utvrđivanju i izboru u organe, kako bi porodice i prijatelji nestalih osoba, na Osnivačkoj skupštini odlučili o njihovom usvajanju i izboru.

Inicijativni odbor je odradio postavljeni zadatak i 01.12.2011.godine zakazao Osnivačku skupštinu na kojoj su porodice i prijatelji nestalih osoba jednoglasno utvrdili i donijeli:

1. Statut Udruženja porodica i prijatelja nestalih osoba "Suza", broj: 01/11 od 01.12.2011. u dva primjerka;
2. Odluku o osnivanju Udruženja porodica i prijatelja nestalih osoba "Suza", broj: 02/11 od 01.12.2011.godine;
3. Odluku o imenovanju predsjednice Udruženja, broj: 03/11 od 01.12.2011.godine;
4. Odluku o imenovanju osobe ovlaštene za zastupanje Udruženja u pravnom prometu, broj: 07/11 od 01.12.2011.godine;
5. Odluku o imenovanju predsjednika i podpredsjednika Skupštine Udruženja broj: 06/11 od 01.12.2011.godine;
6. Odluku o imenovanju predsjednika i članova Upravnog odbora Udruženja, broj: 05/11 od 01.11.2011. godine ;
7. Odluku o imenovanju predsjednika i članova Nadzornog odbora Udruženja, broj: 04/11 od 01.12.2011.godine;
8. Odluku o imenovanju Sekretara Udruženja, broj: broj: 08/11 od 01.12.2011.godine.

Imenovana predsjednica Udruženja je 09.01.2012. godine podnijela Ministarstvu pravde BiH Zahtijev za upis u Registar udruženja, donešeni Statut, odluke i:

1. ovjeren potpis ovlaštene osobe za zastupanje Udruženja s ovjerenom fotokopijom lične karte;
2. primjerak znaka Udruženja;
3. spisak osnivača Udruženja i ovjerene fotokopije ličnih karata osnivača Udruženja i
4. Zapisnik sa osnivačke Skupštine Udruženja od 01.12.2011.godine.

Na osnovu podnešene dokumentacije, Ministarstvo pravde BiH je 10.05.2012.godine donijelo Rješenje o upisu u Registar Udruženja broj: UP08-07-1-26/12 od 10.05.2012.godine i izvršilo upis Udruženja pod registarskim brojem 1256 u Registru udruženja dana 10.05.2012. godine pod nazivom: Udruženje porodica i prijatelja nestalih osoba "Suza", sa sjedištem u ulici Armaganuša broj 31. Sarajevo, a na osnovu člana 8. i 33. Zakona o udruženjima i fondacijama Bosne i Hercegovine ("Službeni glasnik BiH", br. 32/01, 42/03, 63/08 i 76/11) i člana 4. stav 1) Pravilnika o načinu vođenja registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija ("Službeni glasnik BiH", broj:44/10 i 14/12).

Na osnovu navedenog Rješenja Ministarstva pravde BiH, kao i Obaviještenja Federalnog zavoda za statistiku Sarajevo broj: 07-32.5-28433/12, od 25.05.2012. godine izvršen je registar Udruženja u Poreskoj upravi Federacije BiH Kantonalnom poreznom uredu u Sarajevu, dana 25.05.2012. godine pod identifikacionim brojem: 4201765390001 tako da su, od tog dana, ispunjene sve pravne pretpostavke za rad Udruženja "Suza".

Finansijske pretpostavke za rad Udruženja "Suza" ostvariće se uplatama svih koji to žele na transakcijski račun otvore u Vakufskoj banci DD Sarajevo- Ekspozitura Ferhadija. Instrukcije za uplate su sljedeće:

UPLATIO JE: Na primjer: Mujić Mujo, Titova 7. Tuzla, tel.....

SVRHA DOZNAKE: Uplata članarine ili donacije

PRIMALAC: Udruženje porodica i prijatelja nestalih osoba "Suza",

RAČUN PRIMAOCA: 1601030000062491, u Vakufskoj banci d.d. Sarajevo, BiH.

Članovi organa Udruženja će se potruditi, da se u najskorijem roku, stvore i sve finansijske pretpostavke za funkcionalan rad Udruženja, a te pretpostavke prema članu 19. Statuta Udruženja su prihodi od:

1. Članarina,
2. Dobrovoljnih priloga, donacija i poklona javnih institucija, fizičkih i pravnih lica kako u gotovini tako i imovini i uslugama,
3. Državnih subvencija i ugovora sa državom, javnim institucijama, fizičkim i pravnim licima,
4. Prihoda od kamata, dividendi, dobiti od kapitala, zakupnina, honorara i sličnih izvora,
5. Prihoda stečenih kroz ostvarivanje ciljeva i aktivnosti Udruženja u skladu sa Statutom i
6. Drugih izvora u skladu sa važećim zakonima.

Sredstva Udruženja će se koristiti za opremanje i rad Udruženja "Suza" na obavljanju registrovanih djelatnosti, kao što su:

1. Pomoć i koordinacija aktivnosti na pronalaženju nestalih osoba;
2. Prikupljanje informacija o sudbini nestalih osoba i formiranje baze podataka;
3. Prikupljanje video i audio snimaka, fotografija, izjava i svjedočenja kao i ostalih materijalnih dokaza o nestalim i dostavljanje istih nadležnim organima na postupanje;
4. Rad na spiskovima žrtava 1992-1995;
5. Obilježavanje stratišta ubijenih i nestalih;
6. Organizovanje različitih vidova edukacije članova Udruženja;
7. Saradnja i koordinacija sa svim institucijama i drugim organima i organizacijama u BiH i međunarodnim organizacijama radi ostvarivanja ciljeva Udruženja;
8. Razmjena iskustava sa istim ili sličnim udruženjima u BiH i inostranstvu radi ostvarivanja ciljeva Udruženja;
9. Praćenje ljudskih prava, uočavanje pojava kršenja ljudskih prava i zalaganje za zaštitu istih;
10. Zalaganje za dijalog različitih kultura;
11. Izdavanje knjiga, časopisa, brošura i drugih publikacija radi ostvarivanja ciljeva Udruženja, u skladu sa Zakonom.

II PROGRAM RADA UDRUŽENJA "SUZA" ZA 2012. GODINU

U skladu sa članom 9. Statuta Udruženja i Programom rada Udruženja za period 2012-2015 godina, definisane su i predstavljene programske aktivnosti za rad Udruženja u 2012. godini kroz šest logički srodnih grupa (poglavlja) koja trebaju, uporednom implementacijom, stvoriti pretpostavke za efikasno funkcionisanje Udruženja, a to su:

1. Programskih aktivnosti na opremanju Udruženja;
2. Aktivnosti na donošenju regulative;
3. Programske aktivnosti na traženju nestalih;
4. Programske aktivnosti na spiskovima žrtava 1992-1995;
5. Saradnja sa vladinim i nevladinim organima i organizacijama;
6. Saradnja sa sredstvima informisanja u cilju promocije rada Udruženja.

1. PROGRAMSKE AKTIVNOSTI NA OPREMANJU UDRUŽENJA

1.1. Nabavka osnovnih sredstava i potrošnog materijala

Obzirom da se Udruženje nalazi na samom početku svoga rada neophodno je izvršiti nabavku elementarnih osnovnih sredstava i potrošnog materijala za rad kao što su nabavka poštanskog sandučeta, telefona, kompjutera - laptopa, fotoaparata, kamere, opreme za audiovizualno snimanje, nabavka knjiga za ulaznu i izlaznu poštu, poslovnih knjiga, knjiga za vođenje evidencija o nestalim, pronađenim, knjiga za vođenje članstva Udruženja i dr.

1.2. Rad na iznalaženju poslovnog prostora

Adekvatan i kvalitetan poslovni prostor predstavlja veoma važan faktor za stručno i efikasno obavljanje poslova Udruženja. Prostor u ulici Armaganuša 31. Sarajevo, gdje je sada sjedište Udruženja, je privatni stambeni prostor Predsjednice Udruženja. Taj prostor je samo privremeno rješenje, i predložen je kao prelazno rješenje dok se ne stvore finansijske pretpostavke za finansiranje troškova smještaja Udruženja na drugoj lokaciji. Udruženje će u 2012. godini raditi na stvaranju potrebnih finansijskih pretpostavki za stvaranje boljih smještajnih uslova za rad Udruženja.

1.3. Definisanje baza podataka

Da bi rad Udruženja bio djelotvoran i pouzdan potrebno je da organi Udruženja u 2012. godini utvrde i definišu elementarne osnove podatke koje će prikupljati, to znači da na samom početku dobro definišu baze podataka koje treba da vodi Udruženje, kao i konkretizirati osobe koje su zadužene za konkretne poslove.

2. AKTIVNOSTI NA DONOŠENJU REGULATIVE

Svi organi Udruženja trebaju u 2012. godini donijeti ,sve, Statutom predviđene pravilnike, poslovnike i odluke, pojedinačno, kako je ko, po Statutu, nadležan:

- 2.1. Prema članu 12. Statuta Udruženja, Sekretar Udruženja vodi Spisak (evidenciju) članova. Po istom članu Udruženje treba definisati pristupnicu, koju će definisati Predsjednica Udruženja;

- 2.2. Prema članu 16. Statuta Udruženja, UO Udruženja treba donijeti Pravilnik o disciplinskoj odgovornosti;
- 2.3. Prema članu 18. Statuta Udruženja, Udruženje (Sekretar) vodi evidenciju istupanja iz Udruženja;
- 2.4. Prema Članu 22. Statuta Udruženja potrebno je da Predsjednik i Podpredsjednica Skupštine sačini Poslovnik o radu Skupštine;
- 2.5. Prema članu 27. Statuta Udruženja, potrebno je da Predsjednik i Podpredsjednik Skupštine sačini Finansijski plan Udruženja;
- 2.6. Prema članu 27. Statuta Udruženja, Predsjednica udruženja treba da sačini godišnji program i plan rada Udruženja, a da isti usviji Skupština Udruženja;
- 2.7. Prema članu 27. Statuta Udruženja, Predsjednik i Podpredsjednik Skupštine treba da sačine Odluku o visini članarine i da istu predlože Skupštini na usvajanje;
- 2.8. Prema članu 30. UO treba da sačini i donese Odluku o upotrebi sredstava;
- 2.9. Prema članu 30. UO treba da sačini i donese Odluku o formiranju komisija, odbora, stručnih timova i sekcija radi realizacije postavljenih ciljeva Udruženja;
- 2.10. Prema članu 42. Predsjednik udruženja inicira i predlaže UO akte i odluke i podnosi Izvještaj o radu Udruženja Skupštini;
- 2.11. Prema članu 46. Statuta Udruženja, Sekretar Udruženja obavještava o sastancima Udruženja, vodi zapisnik sa istih, prima pristupnice za članstvo i vodi evidenciju članova Udruženja na propisanom obrascu. Sekretar prikuplja i vodi evidenciju o članarini;
- 2.12. Prema članu 22. Statuta Udruženja, UO donosi Pravilnik o čuvanju i upotrebi pečata.

Pored navedene regulative, koju treba u 2012. godini donijeti, po pojedinim organima Udruženja, svi članovi Udruženja biti će u stalnoj informativnoj i pisanoj komunikaciji radi blagovremenog obraćanja Udruženja državi, entitetima, općini i javnim institucijama radi traženja subvencija, kao i konstantno raditi na poboljšanju formulacijske komunikacije iz ove oblasti, kako bi stvorili, barem, minimalne finansijske pretpostavke za uspješan rad Udruženja "Suza".

3. PROGRAMSKE AKTIVNOSTI NA TRAŽENJU NESTALIH

- 3.1. Obilježavanje masovnih i pojedinačnih grobnica na području općine Rogatica i obraćanje Institutu za nestale BiH

Da bi Udruženje moglo raditi na ubrzanju pronalaska nestalih, odnosno, pružati institutima i organizacijama koje se time bave, nedostajuće informacije o mjestima masovnih i pojedinačnih grobnica, Udruženje treba formirati bazu podataka nestalih osoba sa područja općine Rogatica.

Iz tih razloga neophodno je da se Udruženje obrati Institutu za nestale osobe BiH radi dostavljanja spiska evidentiranih nestalih osoba sa područja općine Rogatica u tom Institutu, kako bi Udruženje pokušalo preko svoga članstva i simpatizera utvrditi, da li su svi nestali sa područja općine Rogatica i prijavljeni, tom Institutu.

Da bi Udruženje moglo tragati za informacijama o nestalim, a još ne pronađenim osobama, od Instituta, takođe, treba tražiti spisak nestalih, a pronađenih, kao i spisak nestalih, a ne pronađenih osoba.

Prema članu 20. Zakona o nestalim licima ("Službeni glasnik BiH" broj 50/04) porodice nestalih lica ili njihova udruženja mogu da zatraže da se mjesta ukopa i iskopa (pojedinačna ili zajednička mjesta) obilježe, bez obzira na broj žrtava, odnosno, nestalih lica. Obilježavanje mjesta ukopa i iskopavanja realizuje se nakon što nadležni organ za traženje nestalih lica izda uvjerenje- potvrdu da je na predloženom lokalitetu za obilježavanje izvršeno iskopavanje tijela, odnosno da je postojala grobnica.

Na osnovu prethodnog, Udruženje će podnijeti Institutu Zahtijev za izdavanje uvjerenja(potvrda), svih lokaliteta gdje je do sada izvršeno iskopavanje tijela, odnosno, gdje je postojala grobnica, masovna ili pojedinačna, da bi Udruženje moglo da obilježi sve grobnice i utvrdi godišnji kalendar zajedničkog odlaska i dostojanstvenog zajedničkog obilježavanja .

U prvoj godini svoga formiranja Udruženje “Suza” planira uraditi projektno-tehničku dokumentaciju, kao i izgradnju pristupnog puta i spomen ploču nestalim, ubijenim i pronađenim od strane Instituta za nestale BiH, u masovnoj grobnici u selu Kozadre (sedam pronađenih), radi redovnog godišnjeg obilježavanja.

Udruženje “Suza” ,takođe, planira i izgradnju spomen ploče u selu Kozadre kao znak sjećanja na dan napada, ubijanja, zarobljavanja, ranjavanja, protjerivanja svih njegovih stanovnika i do temelja rušenja i paljenja njihovih objekata i kuća, a to je 02.08.1992.godine.

3.2. Obraćanje Međunarodnoj komisiji za nestale osobe ICMP

Udruženje će, od Međunarodne komisije za nestale(ICMP), potražiti svaku ICMP-u raspoloživu, moguću, pomoć da bi ostvarilo svije programske ciljeve. Pored evidencija, lokacija i raspoloživih podataka o nestalim i stradalim osobama kojima raspolaže Međunarodna komisija za nestale, Udruženje će tražiti i finansijsku pomoć za opremanje i realizaciju ciljeva Udruženja.

Udruženje će, takođe, biti na usluzi i pružati sve neophodne informacije i raspoložive podatke, kako Međunarodnoj komisiji za nestale, tako i svim nadležnim institucijama za traženje i procesuiranje nestalih i stradalih u BiH u periodu 1992-1995 godine.

3.3. Obraćanje Federalnom Zavodu za statistiku

Da bi programski zadaci, na ažuriranju spiskova žrtava 1992-1995 godina, bili sistematično obrađeni, Udruženje će se u 2012. godini obratiti Federalnom zavodu za statistiku Sarajevo, sa molbom da mu se dostavi posljednji popis koji je odrađen u Rogatici u 1991. godini, u tvrdj i elektronskoj formi, kako bi moglo pouzdano odraditi i utvrditi spisak žrtava u proteklom ratu za porodice ali i za Institut za istraživanje ratnih zločina.

3.4. Obraćanje općini Rogatica za pomoć u pronalaženju nestalih

Poštujući Zakon o nestalim licima BiH (član 3. “pravo da se zna”, član 4. “obaveza osiguranja informacija”, član 5. ”način razmjene informacija”, član 6. “obaveznost razmjene i saradnja”, član 23. “zaštita podataka”), Udruženje “Suza” će se obratiti općinskim organima u Rogatici po “osnovu obaveze osiguranja informacija” da se dostave imena predsjedavajućih kriznih štabova u predratnom i ratnom periodu i imena učesnika u pojedinim akcijama i operacijama na mjestima pojedinačnih i masovnih stradanja, kako bi isti pružili informacije o mjestima njihovih stradanja i mjestima posmrtnih ostataka.

3.5. Obraćanje porodicama stradalih i svim građanima Rogatice radi prikupljanja podataka

Činjenica je da su porodice stradalih sa područja općine Rogatica, preumorne od silnih istražitelja, ali je i još žalosnija činjenica da se ni nakon 20 godina od od tih stradnja, još uvijek pouzdano ne zna broj poginulih, ranjenih, nestalih i protjeranih i izbjeglih sa područja općine Rogatica. Mislim da je ovo Udruženje poslednja šansa da se taj posao pouzdano odradi.

Naravno, to neće zavisiti samo od Udruženja i njegovih organa. Ukoliko se svaki pojedinac, prvenstveno prijateljni građanin sa područja općine Rogatice, maksimalno ne potruđi, kako fizički tako i materijalno,

kako oni unutar BiH, tako i oni u dijaspori, kako oni koji imaju stradalog, tako i oni koji nemaju, ali su protjerani ili izbjegli, ne može se očekivati, da će naši parcijalni pokušaji u Udruženju biti dovoljni.

Obraćam se posebno porodicama koje imaju poginulog, ranjenog ili nestalog da iskažu istražiteljima dovoljnu dozu sabura, prilikom davanja podataka. Ako mi, stradale porodice, nećemo davati podatke niko ih ne može ni prikupiti. Mi smo porodice stradalih svakako, gubitnici, i mi nemamo što više izgubiti, a posebno kriti. Zato pružimo ruku saradnje svima koji traže podatke, nemojmo samo "računati koliko će ko zaraditi na našoj mucu", jer niko, ama baš niko, izgleda u ovoj zemlji nije nadležan da utvrdi spiskove stradalih sa područja naše općine, osim svih nas samih. A ti, pouzdani spiskovi, su pravno, ali i istorijski neizmjereno jako važni.

Isto tako nemojmo očekivati od ovih vrijednih požrtvovanih ljudi u ovome Udruženju, da oni trebaju besplatno trkati tamo ili ovamo. Oni nisu tu, da se obogate, dok je autor ovoga projekta na čelu ovoga Udruženja, ali zasigurno nisu ni besplatne sluge kojima će neki iz udobnih fotelja, daljinskim upravljačima, bez finansijske refundacije dijeliti zadatke.

Svi opravdani troškovi, koje u obavljanju programskih zadataka budu napravljeni, treba i da budu plaćeni, kao i naknade ljudima za utrošeno vrijeme.

4. PROGRAMSKE AKTIVNOSTI NA SPISKOVIMA ŽRTAVA

Činjenica da niti jedno pravno ili fizičko lice ne raspolaže pouzdanim spiskovima sa jedinstvenim matičnim brojevima stradalih stanovnika općine Rogatica u ratnom periodu 1992-1995 godina, datih od neposrednog srodnika ili komšije sa identificiranim dokumentom, što je osnova za dokazivanje bilo kakvog stradanja, je dovoljan razlog, da Udruženje poduzme sve neophodne korake da se takav spisak sačini.

Kao najbolja osnova za taj istorijski korak, mislim, da je Projekat sa Univerziteta u Sarajevu Instituta za istraživanje zločina protiv čovječnosti i međunarodnog prava Sarajevo na čelu sa prof. Smailom Čekićem koji je prije 2-3 godine okupio 100-tinjak rogatičana na obuku za sticanje zvanja Istraživač za prikupljanje podataka na naučnoj osnovi za Naučnoistraživački projekat "GENOCID U GORNJEM PODRINJU 1941-1945 I 1991-1995".

Tada su učesnicima podijeljene Popisne liste za svako selo i svaku ulicu, koji je radio Republički zavod za Statistiku 1991. odine. Te liste su najtačniji i najbolji vodič za popis stradalih, kako niko nikada ne bi mogao da obori ili ospori prikuplene podatke, a što se često na sudovima događa. Uz popis su podijeljeni i kompleti obrazaca kako slijedi:

I OBRAZAC "A" JE ZA:

1. ubijene;
2. ranjene;
3. trajno nestale.

II OBRAZAC "B" JE ZA:

zarobljene (u školi, kući, garaži), za one koji su živi;

III OBRAZAC "C" JE ZA:

za zaštićene objekte u privatnoj i društvenoj svojini u ulici koja se obrađuje;

IV OBRAZAC "D" JE ZA:

Masovne grobnice za 3 i više lica u području koje istraživač obrađuje;

V OBRAZAC "E" JE ZA:

VI OBRAZAC "F" JE :

Evidencioni list protjeranih (za njih nisu potrebni iscrpljujući podaci kao npr JMB i sl)

Udruženju "Suza" bi bilo najjeftinije i najbolje ,da kada se steknu materijalno tehnički i finansijski uslovi, (ili ako se javi dovoljan broj entuzijasta), da Udruženje nastavi sa ovim projektom tako da u budućnosti skenira i objavi sve ove obrasce putem rogatica.com ili na neki drugi način, da građani sa područja općina Rogatica, ma gdje bili, popune njima odgovarajuće obrasce i da ih dostave nadležnom istraživaču, radi provjere, identifikacije i potpisivanja .

Ovaj Projekat je stao, jer nema novca za njega. Istraživači nisu u mogućnosti da o svom trošku hodaju i prikupljaju podatke. Predsjednica Udruženja je selo Kozadre odradila i poslala Institutu besplatno. Taj posao je trajao cijelo ljeto. Iz tih obrazaca crpljeni su svi ovi i drugi potrebni podaci.Čak su isti, zbog nedostatka drugih pouzdanijih podataka, korišteni i u Haškom tribunalu. Predsjednica Udruženja je odradila skoro cijelu ulicu Zakula, a onda je i sama stala, jer niko za ovo ne pokazuje interes. U ovom poslu su osim sadašnje predsjednice angažirani i mnogi drugi rogatičani, ali bez novca, i bez pokrića troškova, nisu mogli "naprijed".

Predsjednica pouzdano zna, koliko je vremena, truda, strpljenja, benzina, i svega drugog, bilo potrebno, dok je na tome radila, i još uvijek pokušava da "gura" ovaj dobro osmišljen projekat. Ali, Predsjednica kao vođa projekta se nada da ćemo to, ako ovaj Program bude podržan, i završiti. Zato molimo sve one koji ne mogu na ovome, fizički da rade, iz bilo kojeg razloga, da projekat finansijski podrže, one koji to mogu i hoće. To je za nas sve jako važno.

Planirano je da seshima članovima Udruženja podije po jedna (njihova) ulicu ili selo zajedno sa obrascima i statističkim popisom iz 1991. godine kako bi smo završili taj započeti Projekat, ali samo uz uslov, da svi troškovi budu svima nadoknađeni. Istu šansu dobiće i svi dobrovoljci, koji to žele odraditi. Najbolje i najjednostavnije je za projekat i za istraživača da radi onu ulicu ili selo u kojem je stanovao i čije je stanovnoke poznao.

5. SARADNJA SA VLADINIM I NEVLADINIM ORGANIMA, ORGANIZACIJAMA I UDRUŽENJIMA

Za uspješnost rada Udruženja, od izuzetne je važnosti, dobra suradnja, stručna i finansijska pomoć Ministarstva za ljudska prava i izbjeglice BiH, Ministarstva za raseljena lica i izbjeglice FBiH, Vijeća Ministara BiH, Vlade FBiH, Ministarstva financija BiH i FBiH, Ministarstva sigurnosti BiH, pravnih i fizičkih lica koja mogu i žele subvencionirati naše Udruženje, kao i svih drugih organa i organizacija i sudionika koji se dotiču ove problematike. Udruženje će se pismeno svima obratiti.

Udruženju Suza je, od izuzetne važnosti i uspostava tijesne saradnje sa nevladinim organizacijama. Ova saradnja se ogleda u aktivnostima Udruženja koje planira uspostaviti sa nevladinim organizacijama iz različitih dijelova BiH, koje su u svojim aktivnostima ocjenjene kao vrlo uspješne.

Saradnja sa međunarodnim organizacijama je neophodna za ostvarivanje programskih ciljeva ovoga Udruženja. Udruženje će nastojati da uspostavi dobru saradnju sa svim međunarodnim organima i organizacijama, ambasadama, konzulatima i predstavništvima, koji mogu da osjete i razumiju ovu problematiku.

6. SARADNJA SA SREDSTVIMA INFORMIRANJA

Veliku nadu Udruženje "Suza" polaže u sredstva informiranja. Dobra saradnja sa njima pruža brzu, ekonomičnu i jednostavnu mogućnost komunikacije i prikupljanja podataka. Ovo Udruženje je, i plod

dobre informatičko tehničke i komunikacijske saradnje. Današnje tehničke mogućnosti su, porodicama koji traže svoje nestale šansa. Dobra saradnja na rogatica.com je osnova za uspjeh ostvarenja programskih ciljeva.

Udruženje će nastojati da se materijalno tehnički što bolje opremi i izgradi što je moguće bolje odnose i saradnju kako sa rogatica.com, tako i sa Dnevnim avazom, TV Hayatom i svim drugim koji nam pruže priliku za dobru saradnju.

Udruženje "Suza" planira otvoriti i održavati svoju Web stranicu, kada se za to stvore finansijske i materijalno tehničke mogućnosti.

III FINANSIJSKI PLAN UDRUŽENJA ZA 2012. GODINU

1.1. Plan prihoda za 2012. godinu

Planirani prihodi i u 2012. godini se zasnovani su na potrebama Udruženja "Suza" u skladu sa Planom i programom rada Udruženja "Suza" za 2012. Godinu

Ukupno planirani prihodi Udruženja "Suza" za 2012. godinu iznose 38.000 KM i sastoje se od prihoda od članarina, donacija i subvencija.

Iz narednog tabelarnog pregleda mogu se sagledati svi planirani prihodi i rashodi po pojedinim kontima za 2012. godinu:

- u KM-				
KONTO	PRIHODI-NAKNADE I RASHODI	Ostvareno u 2011.	Plan za 2012.	Indeks u %
	A.UKUPNO PRIHODI	0	38.000	-
410	Prihodi od članarina	0	3.000	-
411	Prihodi iz budžeta - subvencija	0	20.000	-
412	Humanitarni prihodi od donacija	0	15.000	-
417	Prihodi od vlastite aktivnosti	0	-	-
418	Ostali prihodi	0	-	-
419	Raspored prihoda	0	-	-
	B. UKUPNI RASHODI	0	37.000	-
000	Opremanje ureda: kompjuter,tel,post sand	0	10.000	-
400	Materijal i energija	0	5.000	-
401	Usluge PTT, bankarske, knjgovodst i dr	0	1.000	-
402	Primanja angažovanim	0	2.000	-
403	Amortizacija	0	0	-
404	Kamata i premije osiguranja	0	0	-
405	Putni troškovi	0	5.000	-
406	Projektni rashodi	0	10.000	-
407	Porezi i doprinosi	0	0	-
408	Ostali rashodi	0	4.000	-
409	Raspored rashoda	0	0	-
	C. RAZLIKA PRIHODA I RASHODA (A-B)	0	1.0000	-
-	Ukupan broj članova Udruženja	0	125	-

1.2. Plan rashoda za 2012. godinu

Obzirom da je Udruženje "Suza", registrovano kod Ministarstva pravde BiH dana 10.05.2012. godine i da se nalazi na samom početku svoga materijalno tehničkog opremanja i rada, neophodna su mu sredstva za nabavku osnovni sredstava za početak rada, kao što su kompjuter, telefoni, kamera, foto aparat, audio vizualna oprema, poslovne knjige i knjige protokola, osnovnih troškova prevoza, objave u "Službenom glasniku BiH", PTT troškova, takse za registraciju i ostalih opravdanih troškova vezanih za samu djelatnost Udruženja.

U prethodnom tabelarnom pregledu takođe su dati predviđeni troškovi (rashodi) Udruženja "Suza" u 2012.godini, koji se planiraju pokriti predviđenim finansijskim prihodima za tu godinu.

Broj: P-04-2/2012
31.05.2012. godine
Sarajevo

Predsjednica
Maida Ćurevac, s.r. _____

Na osnovu člana 27. Statuta Udruženja porodica i prijatelja nestalih osoba „Suza“, stava 4. Skupština Udruženja porodica i prijatelja nestalih osoba „Suza“, na 2. Sjednici, održanojjuna 2012. godine, na prijedlog Predsjednice Udruženja porodica i prijatelja nestalih osoba „Suza“, donosi

ODLUKU

O DAVANJU SAGLASNOSTU NA PROGRAM RADA I FINANSIJSKI PLAN UDRUŽENJA PORODICA I PRIJATELJA NESTALIH OSOBA „SUZA“ ZA 2012. GODINU

I

Daje se saglasnost na Program rada i finansijski plan Udruženja porodica i prijatelja nestalih osoba „Suza“ za 2012. godinu.

II

Okvirni program rada i finansijski plan iz tačke I Odluke je sastavni dio ove Odluke.

III

Za realizaciju ove Odluke zadužuje se članovi Udruženja „Suza“, svako u okviru svojih ovlaštenja i nadležnosti.

IV

Ova Odluka stupa na snagu narednog dana od dana donošenja.

Broj: SU-01-2/2012

Sarajevo, juna 2012.godine

Predsjednik

Fadil Lutvić